



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 8



Takok angutsü atema BJP-i tim masüba inyaksüa akok: Rakesh Tikait

Ukraine-i Russia nem tatok magütsütsü: Zelenskyy



VOL. XIX NO. 144 (ADOK 144) DIMAPUR SANGTENNÜ (TUESDAY) METSÜREMI (MARCH) 08, 2022

₹ 5.00

## Turkey-i Russia o Ukraine den senden amentsü

**New Delhi, March 7, 2022 (Agencies):** Turkey, Ukraine aser Russia nungi Foreign Minister tem Brihostibarnü senden ka amentsü ta Turkey Foreign Affairs Minister Mevlut Cavusoglu-i Hombarnü ashi.

Antalya nung Diplomatic Forum indang shilem ka ama senden nung Russia Foreign Minister Sergey Lavrov aser Ukraine Foreign Minister Dmytro Kuleba naprong adentsü, ta Mevlut Cavusoglu-i metetdaksü.

"Lavrov aser Kuleba na Antalya-i arutsü. Senden nung ni adentsü. Onoki iba senden amentsü atema kanga merangogo" ta paisa ashi.

Iba senden ajanga tarutsü nung yimjung aser tesünap bener arutsü. Tang atemabo

rara amentsü atema tongti süa inyaker, ta Cavusoglu-isa ashi.

Turkey President Recep Tayyip Erdogan-ia Russia President Vladimir Putin den phone ajanga jembi.

Russia-i atsünga aliba Ukraine yimtitem nungi nisungtem anientsü atema mapa inyaksü aser yimjung tenangzüktep ka agitsü atema Erdogan-i Putin dang ashi.

Tekaratiba nung tim inyakyim ajanga Ukraine khuret angatetteptsü atema yaritsü renema lir, ta Turkey President Erdogan-i metetdaksü.

"Iba tesem nung general ceasefire ka aliba ajanga meimchirtemi ajuruba khuretem koktetba dang masü saka yimtenren telatetba ka agitsü lenmang lapoktsütsü" ta Erdogan-isa ashi.

## Arunachal yimdaklirtemi NSCN telungpurtem anema lungkak ait

**Dibrugarh, March 7, 2022 (Agencies):** Arunachal Pradesh kübok Tirap district nung Assam Rifles sepaitem aser NSCN-IM telungpurtem tsünda khatepba Hombarnü anen.

Iba ya Kapu yim nung atalok aser khatepba tesem nung sepaitemi HK series assault rifle ka, magazine ka aser injang rounds 40 ngutetogo.

NSCN-IM anema noktakba sayua Kapu nungertemi Hombarnü telungpurtem anema lungkak aitba sentong ka agi.

Iba sentong nung tetsür aser tanurtem aden aser NSCN telok balalai tanen makai timtem agütsüba parnoki aitsü.

Arunachal Pradesh nung telungpur teloktemi tashiyim mapa inyakba aser özüngi memelaba tax saruba anema timdaklirtemi tezülubatam amer lungkak aita liasü.

NSCN-IM telungpurtemi Kapu nung dokantem, contractors aser shishilembartem dang nungi sen meshi. Parnokisa gari lenmang yangluba company ka dang Rs 1 lakh meshia liasü.

## COVID-19 Nagaland: 10 dak putet, 5 taneptsü angu

**Kohima, March 7, 2022 (TYO):** Nagaland nung Hombarnü nisung 10 dak COVID-19 putet aser 5 taneptsü angu.

Tanü Dimapur nung nisung 5, Kohima o Mokochung nung anana (2) aser Kiphire nung ka dak COVID-19 putet. Külén, taneptsü angurtemji Dimapur nung nisung 3 aser Kohima o Wokha nung kaka (1) lir.

Nisung 35,430 rongnungji 33,129 taneptsü nguogo aser ibaji taneptsü angur 93.50% lir.

Nagaland nung tang nisung 62 anepaludar saka parnok 57 dakbo shirangba yimya kecha mali.

March 6, 2022 tashi nung arishi küm 15 nungi 18 tsünda tainyinlong 85,587 nem COVID-19 vaccine agütsüogo. Kasa mapang arishi küm 18

ser temapur nisung 8,16,226 nem COVID-19 vaccine indang dose 14,72,016 agütsüogo.

Vaccine agirtemji frontline workers 61,041, healthcare workers 16,017, arishi küm 45 ser temapur 2,20,999 aser arishi küm 60 ser temapur 5,18,169 lir.

Vaccine agirtem rongnungji nisung 6,32,895-i dose anaprong agiogo. Parnokji frontline workers 48,920, healthcare workers 13,606, arishi küm 45 ser temapur 1,88,717 aser arishi küm 60 ser temapur 3,81,652 lir.

Maneni, nisung 22,895 nem precautionary dose agütsüogo. Parnokji health care workers 3,418, frontline workers 17,400 aser arishi küm 60 ser temapur 2,077 lir.

## Assembly elections 2022 Exit polls: BJP-i takok tajungba angutsü

**New Delhi, March 7, 2022 (Agencies):** Manipur, Punjab, Goa, Uttar Pradesh aser Uttarakhand nung Assembly elections agiba indang exit polls results metetdaksüogo.

**Manipur :**

Republic TV-i sangdongba P-MARQ exit polls ajanga Manipur nung BJP-i maneni sorkar akümsü shia lir.

**Manipur:**

India News: BJP - 23-28 | Congress - 10-14

Republic-TV: BJP - 27-31 | Congress - 11-17

Zee News-DESIGNBOXED: BJP - 32-38 | Congress - 12-17

**Uttar Pradesh:**

Uttar Pradesh nunga exit polls

ajanga BJP-i takok angutsü ta ashir. Iba state nung BJP-i menden 200 tema angutsü aser Samajwadi Party-i BJP den meneptepa takok angutsü ta exit polls aseme metetdaksüogo.

Metriize: BJP - 262-277 | SP - 119-134

**Punjab:**

Punjab nung exit polls pezü ajanga AAP-i menden teimtiba nung takok angutsü ta ashir.

India Today-Axis: AAP - 76-90 | Congress - 19-31 | BJP+ - 1-4 | SAD+ - 7-11 (Total seats: 119).

**Goa:**

Goa nunga BJP-i menden teimba nung takok angutsü ta exit polls kari metetdaksüogo.

Ajisüaka, Zee News exit poll-

ibo Congress teloktepi menden 14-19 aser parnok sülen BJP-i menden 13-18 shi ka angutsü ta metetdaksüogo.

**Uttarakhand:**

Uttarakhand nungbo BJP aser Congress kanga anasatepa takok angutsü.

ETG Research: BJP - 38 | Cong - 30 | AAP - 1 (Total seat: 70).

C-Voter: BJP - 26-32 | Cong - 32-38 (Total seat: 70).

Times Now: BJP - 37 | Cong - 31 | AAP - 1 | Others - 1 (Total seats: 70).

Exit polls ajanga bushitetba ya teti dangbo shitak masü. March 10 nü votes azüngdang ang tatembangba results metettsü.

## Manipur nung tanü polling booth 7 nung re-poll asütsü

**Imphal, March 7, 2022 (Agencies):** Election Commission of India (ECI)-i Hombarnü Manipur kübok district asem nung re-poll asütsü atema tetuyuba agütsüogo.

"Manipur Assembly elections shilem tanabuba nung adenba polling booths 7 nung March 8 nü re-poll asütsü" ta Chief Electoral Officer (CEO) Manipur Rajesh Agrawal-i ashi.

Iba nung polling booth ka Thoubal district nung aser Ukhrul o Senapati district tem nung asemsem lir.

"Nisung kari EVMs raksatsüba ajanga re-poll asütsü lemtet. Iba tatalokba ajanga vote

enoktsürtem nem timtem agütsür kechiyong parnoki tanaben repoll anogo nung vote enoktsütsü" ta CEO Rajesh-i ashi.

Ukhrul aser Senapati nung Honibarnü polling asüdüng özüng alema inyak. Assembly election tanabuba shilem nung constituency 22 nung polling agia liasü.

March 8, 2022 nü re-poll asütsüba polling station temji Ukhrul constituency nung Ukhrul (E-2), Chingai constituency nung Kalhang aser Peh (B), Karong & Tadubi ACs nung Ngamju, Yang Khullen aser Mao Marafii lir.

March 5 nü polling asüdüng

EVMs 12 tashi raksatsü ta Manipur CEO office ajanga metetdaksü.

Polling booth 7 nung dang re-poll asütsü indang tetuyuba agütsüba atema Manipur joint CEO Ramanda Nongmeikapam-i "EVMs data kar magizükteter. VVPATs kar shitak lir. Control unit raksaka VVPAT nungi results metettsü akok" ta ashi.

Manipur Assembly election tanabuba shilem nung lendong balala atalokdang nisung 2 tashi asü. Nikongdang 5:00 ako tashi nung vote enoktsür 76.62% liasü aser March 10 nü votes azüngtsü.

## Chakhesang nung Clean Election Movement senden amen

**Kohima, March 7, 2022 (TYO):** Hombarnü Chakhesang Clean Election Movement (CCEM) indang Core Committee-i Kohima nung Chakhesang Public Organisation (CPO) den Chakhesang nung tongti teloktem den senden ka menogo.

"Clean Election dak sendakba inyakyim aser posters o pamphlets atema sentong renemtsü" ta CCEM Chairman Rev. Vezopa Rhakho-i tanü ashi.

"Nagaland nung Clean Election Movement aser NLPT Act atema arogo lutsür saka iba ya arogoi tamakok anguba atema masü. Arogoi mapang agiaka nisungtem nem shisatsü agütsür aser tajung o tamajung bendangtsü angatetdaksür. Iba mapa nung shilem tera danga tajung inyaktetbaji tuluka lir anungji züngsemtemi tezü

matangtsüla" ta Rev. Vezopa-i metetdaksü.

Iba senden nung CCEM züngsem Murohu Chotso-ia electoral roll indang osang tejangja metetdaksü aser electoral roll nung nisung ka-vote ka tenüng züluoktsü atema nenshia jembi.

"Electoral system ya kanga tajung saka iba nung tim masüba inyakerem majung. Anungji arogoi elections nung tim masüba inyakba anema clean election campaign maneni inyaksü" ta Chakhesang Baptist Church Council (CBCC) Executive Secretary, Rev. Khrotso Mero-i ashi.

"CPO ya telok tongtiba lir. Mapa tajung ka inyakdang anema jembirtem aser lutsürtem teti alir, saka asenoki item nung temolung magütsütsü saka alizüng atongtsü atema bilema inyaksüla. CPO-i clean election movement pusemstsü aser iba

osang prokshitsü" ta CPO President Vezuhu Keyho-ia senden nung metetdaksü.

Chakhesang Youth Front President Vezhoduyi Nakro-ia electoral roll nung küm agi mabensartem züluoka aliba agientsü indang jembi.

"CYF-i clean election movement pusema nungittsü aser nübertem asoshi tajung inyaksü renema lir" ta Vezhoduyi-isa metetdaksü.

Tanü senden nung adenertemi Chakhesang nung tesem nung shisatokden sentongtem ayonga agitsü jembitep. Iba atema Area chairman aser CCEM züngsemtemi ketdangtsüa inyaksü.

CBCC-i March 27 nü Clean Election Sunday ta ser amongtsü sentong lir aser iba mapang clean election movement indang osang prokshitsü.

# Dimapur nung media workshop ka agi



Hotel Saramat, Dimapur nung March 7, 2022 nü VARTALAP workshop agidang Dimapur nung aliba osangbener, shisalen sayur aser iba sentong ayongzükertem külemi tangokba noksa nung angur.

**Dimapur, Metsüremi/March 07 (TYO):** Ministry of Information and Broadcasting kübok Press Information Bureau Kohima ajanga media workshop sentong ka Hotel Saramati, Dimapur nung March 7, 2022 nü 'Improving information dissemination in Nagaland' omen nung ajemdaker ayongzüka liasü.

Iba sentong nung tesemdanger tongti, Dr Nyanthung Kikon, State Nodal officer, Integrated disease surveillance programme, Directorate of Health & Family ajanga asen state nung COVID-19 tashidak ketdangsuba aser vaccine agiba maparen nung media ajanga

tongti shilem agitsü nungdakbatem rateta shia liasü. Iba workshop nung shisalen sayurtem rongnung Lolano Patton, DPRO Dimapur ajanga "Improving information flow from implementing agencies of government welfare schemes to DIPR, independent media & public" onük nung ajemdaker jembia liasü.

State nung sorkar indang welfare scheme balala mapa kuma inyakba indang nüburtem nem junga angatetdaksütsü atema mapa kuma inyaker aser media house balala tsungta osangtsüsang junga agiteptsüla aser amalitep akatsüla, ta DPRO Dimapur ajanga ashi.

Yamaji inyaknung dang temsüa aliba nüburtem ajangzüksü, ta lai ashi.

Khrolou Koza Lohe, Assistant Manager, Nagaland state Disaster Management Authority (NSDMA) Home Department ajanga Nagaland nung lendong timtem balala ajurudang NSDMA ajanga shilem agiba aser telangzüba agütsüba indang jembia liasü.

Lendong timtem balala ajurudang, talisa yimdakyimtsüngtem nung iba ama timtem mapang telangzüba agütsütsü indang jembia aser lendong mapang NSDMA ketdangsur nungi osang melamela agitetsü indanga jembia liasü.

# International Women's Day nung NVCO ajanga nübur ayongzükter

**Dimapur, Metsüremi/March 07 (TYO):** Küm shia International Women's Day ya March 8 nü amunger. Nagaland Voluntary Consumers' Organisation (NVCO) pur hopta ana 'World Consumer Rights Day' amungba nung shilem ka ama NVCO ajanga nübur ajanga dang taküm omen "Break The Bias" ya asangsang nung agizüka bendang-radanga amshiba, meshidak angatetba aser mejungi amshiba nungi pila alitsü aser tetsür-tebur kasa alitsü ayongzükter.

Tetsür ya 'Homemaker' lir aser parnoki tongtipang mapa ajak inyaker, talisa kilung asoshi shishilempaba mungo sorochiokba tashi aser yamaji market nung tetsür indang 'Consumer Rights' akumtsüba amshitsüla aser kasa mapang consumer ka ama tetsür shilem ya kanga tongtipang lir, kong jeret-peret tetsür kati consumer rights wazüka ayuba aser

temaba jenjangi ajungketba nung shilem kanga agiteter, ta NVCO ajanga ashi.

NVCO tir Kezhokhoto Savi ajanga consumer ajakdang aser talisa tetsürtem dang osettsüset aliba mapang teti saksalema alitsü ayongzüka liasü.

Ajisüaka tanü International Women's Day nung tetsürtemi takok anguba benjongti, kechiaser iba anogo ya loktiliba, rongsenketzüng, sobaliba aser yimtenren tsütsü tetsürtemi takok anguba benjonger, ta pai ashi.

Frontline aser healthcare worker ama, scientist, doctor aser caregiver ama COVID-19 tashidak anema raraba tongpang nung tetsürtem yakbang nung nokdaka lir. Kodang tetsüri anidir, terenlok tajung angur aser COVID-19 tashidak wara den raraba nung tatishitsü tajung jenti tetsürtemi anir inyakteta lir, ta Savi-i ashi.

# Phek District DISHA senden menogo

**Dimapur, Metsüremi/March 07 (TYO):** Phek District DISHA senden ya Deputy Commissioner, Phek indang Conference Hall nung March 5, 2022 nü mena liasü.

Iba sentong nung MP (Rajya Sabha) & co-chairperson, DISHA, Nagaland, K.G Kenye dena liasü.

Iba sentong nung Kenye ajanga department balala inyaksangshiba saksalema repranga alitsü aser asadangsü ajungshia liasü. Pai sentong nung adener dang akokba lenmang ajak nung amalitep akatsü ayongzüka liasü.

Kenye-isa sorkar mapa inyakerterem dang lokti ajungkettsü asoshi khuret angatetba officer/employee ka ama nungloksüba mapatem temolung agüja inyaksü ayongzüka liasü.

District nung Centrally Sponsored Scheme tem timi mapa kuma inyaker alitsü ta amanger aser department temi tajungtiba nung inyaksüla, ta pai ashi.

Item mapa ya district nung kinük-kisang ajak atongtsüla, ta MP Kenye-i ajungshia liasü.

Iba senden nung Rural Development Agency, Food &

Civil Supplies, Education, Land Resources, Roads & Bridges, Public Health Engineering, Land Records & Survey, Social Welfare, Urban Development, Department of Employment, Skill Development & Entrepreneurship, PWD (National Highways), Water Resources, Industries & Commerce, PWD (Phek Div.) aser Power department temi PowerPoint presentation agüja liasü aser department balalai timtem ajuruba lemsatapa liasü.

Iba senden nung Deputy Commissioner, Phek, Razouvolie Dozo menden liasü.

# Prepared Speeches aser Painting tetoktepba ayongzükter

**Dimapur, Metsüremi/March 07 (TYO):** Hornbill Fest-cum-MykiFest 2021 sentong ya Hortiscape, Kisama nung December 2-10, 2021 nung ayongzüksü renema liasü, saka Hornbill Festival mapang Mon District kübok Oting nung lendong atalokba ajanga iba sentong thimentsüsa akum, ta Department of Women Resource Development ajanga sangdong ka nung ashi.

Anungji Prepared Speeches aser Painting (Canvas) tetoktepba ya March 8, 2022 anepdang 10:00 ako nungi nikongdang 1:30 ako tashi Sakhrie Park, Upper AG Colony (Tsiepfii Tsiepfie Upper Sector), Kohima nung agitsü sentong lir.

Iba tetoktepba anaprong atema tamendak dak ya Women Empowerment vis-avis Government Policies,

Customary Laws, Entrepreneur ship and Self-Employment alitsü, anungji dang tetsürtem jenjang aser parnok shilem tali tajungba metettsü, ta sangdong ajanga ashi.

Maneni MykiFest Award Programme ya kasa anogo aser kasa tesem nung nikongdang 3:00 ako nung agitsü, ta sangdong ajangasa ashi.



Hombarnü Signal Angami village-Kevijau Colony link road lapokba mapang tangokba noksa ka nung Dimapur-II MLA Moatoshi Longkumer aser colony council zungsemtem angur. Iba lenmang ya Local Area Development Fund ajanga yanglua liasü.

# Counselling & Thematic Issues nung training agütsü



March 3 nungi 7, 2022 tashi Hotel Bravo Royal, Half Nagarjan, Dimapur nung "Certificate Course on Counselling and Thematic Issues" sentong ka ayongzüka agidang tangokba noksa nung angur.

**Dimapur, Metsüremi/March 07 (TYO):** State Level Coordinating Agency Kripa Foundation, Nagaland ajanga anogo pongu "Certificate Course on Counselling and Thematic Issues" sentong ka March 3 nungi 7, 2022 tashi Hotel Bravo Royal, Half Nagarjan, Dimapur, Nagaland nung ayongzüka liasü.

Iba sentong ya Ministry of Social Justice and Empowerment, Govt. of India aser Social Welfare Department, Govt. of Nagaland teyari nung ayongzüka liasü.

Iba training course nungya Arunachal Pradesh aser Nagaland nungi nisung 24-i shilem agia liasü.

Parnok nem temesepba mozü achiba ajanga temang aser tekolok nung timtem agütsüba, yi ajemer anepalutsü, Drug

Addiction Counselling, Skills in drug addiction, conflict resolution, Counselling Technique, Importance of self-care in counselling, Behavioural Change Communication, Documentation, Understanding Women and Substance abuse/Management, 12 steps treatment module, chia-ajemer kibong den mapa inyakba aser relapse management indang sayua liasü.

Iba training nung adenerterem March 6, 2022 nü Shalom Rehabilitation Centre, Chumukedima semdang aser yangji sentong tilaka agiba stilen staff tem den sensaksem kaa liasü.

Wango Langsym, Asstt. Director, Social Welfare Department, Govt. of Nagaland ajanga iba training course nung adener nem kulizüng kaket lema agüja iba sentong tembang.

# Fit India Mobile App ka sayaogo

**Dimapur, Metsüremi/March 07 (TYO):** Azadi Ka Amrit Mahotsav sentong nung shilem ka ama tawa Fit India Mobile App ka sayaogo.

'Age-appropriate Fitness Protocols-GOALS' nung ajemdaker temang anema aliba asadanga app ya Ato Kilonser ajanga 2020 küm September ita saya liasü.

Iba Fit India Mobile App nungya customized diet plans, step counter, calorie monitor, sleep tracker amala features tem keta lir.

Ajaki iba fitness tool ya amshitetsü mechi feature ajanga ya angadi amshitetsü. Fitness test amshitsü atema App nung sayur.

Iba App ya Android aser iOS nung amshitetsü. Iba App download asütsü atema link tem yamai alitsü:

- i. Android- <https://play.google.com/store/apps/details?id=com.sai.fitIndia>
- ii. iOS- <https://apps.apple.com/us/app/fit-india-mobile-app/id1581063890>



Meghalaya kübok South West Khasi Hills district nung nisung kati Yaba süngjang bener aotsü merandang apu. Iba nisung yagi Yaba süngjang 982 tashi Bangladesh-i bener aotsü lia Border Security Force (BSF) sepaitemi apu.

### Cachar nung Maoist tanishir Kanchan Da apu

Guwahati, March 7, 2022

(Agencies): Assam police-i Maoist tanishir Arun Kr Bhattacharjee aser pa den yariteper ka puogo.

Arun dang ya Kanchan Da ta ajar aser Cachar district nung tena apu.

Arishi küm 70 tain Arun Kr Bhattacharjee ya CPI (Maoist) central committee member lir aser strategist ka lir. Pa apur nem Rs 3 lakh senpet agütsütsü sangdonga lir.

Assam kübok Cachar o Dima Hasao district tem aser Manipur kübok Tamenglong district nung Maoist lennir Kanchan Da-i maparen inyakba osang angazükba sülen

Assam police crime branch-i Deobar nikongdang pa aputsü atema mapa tenzük.

Udarband kübok Thaligram, Nagadong aser Patimara Tea Estate nung pa mita ao aser tatemsa Patimara Tea Estate indang 16 No line nung pa apu.

Pa ket nung Rs 3, 60000, laptop ka aser tanga taitüsü aketba osettem ngutetogo.

Iba mapang police-isa Maoist lennir Akash Orang (Rahul/Kajal) apu.

Akash ya CPI-Maoist indang Assam state organizing committee züngsem ka lir aser Kanchan Da den tesentaktep tajung alir ka.

CPI (Maoist)-i Northeast

nung aser talisa Assam nung parnok tera ayangtsü atema meranger.

Assam nung mapa tuluba inyaktsü atema Eastern Regional Bureau nungi senotsü aika yokogo.

Kanchan da dang Jyotish, Kabir aser Kanak ta-a ajar aser pa ya West Bengal nung Howrah kübok Shibpur nungi lir.

Pa nem Assam aser Northeast region ketdangtsütsü atema mapa lezmüksü.

CPI (Maoist)-i Assam nung core committee ka tentettsü aser Assam nung party congress ka ayongzüksü sentong lir.

### Artsülen aliba yim 36 nungi 30 Meghalaya nung adentsü: Conrad Sangma



Conrad Sangma

Shillong, March 7, 2022

(Agencies): Meghalaya-Assam arrtsü anasa mangatettep aliba yimtsüng 36 nungi 30 tashi Meghalaya nung adentsü atema regional committee temi shidangogo ta Chief Minister Conrad K Sangma-i ashi.

Yim 36 indang telongtetji 36.9 sq km lir aser yim 30 indang telongtetji 18 sq km lir, ta pai ashi.

Assam sorkar den arrtsü ken o angatetteptsü atema jembir aser state ana tsüngda mangatettep aliba tesem 12 ajiteta lir, ta chief minister Conrad-i metetdaksü.

"Of the 36 villages claimed by Meghalaya in 2011, a total of 30 have been recommended by regional committees of the two states to remain in Meghalaya. Ownership of land, however, will not be affected after demarcation of the boundary," he said.

"Meghalaya nung 2011 küm yim 36 nungi 30 tashi Meghalaya nung adentsü atema regional committee temi shidanga lir. Ajisüaka, arrtsü latetshiba nung ali kibur memelenshitsü" ta paisa ashi.

Tarabari tesem nung Meghalaya-i tenüng agiba yim

8 tashi state nung adentsü. West Khasi Hills district kübok Gizang nung yim asem asenok ketdangsuba kübok adentsü" ta Conrad-isa metetdaksü.

Hahim tesem nung yimtsüng 12 nungi 11 tashi Meghalaya nung adentsü.

Ri-Bhoi district kübok Boklapara Meghalaya nung adentsü aser Jumrigan Assam dangi aotsü.

Khanapara-Pilangata tesem nung Meghalaya kübok Pilangata, Maikoli aser Barapathar adentsü aser Khanapara o Dreamland Resort Assam dangi aotsü. Brahmaputra Realtors ajunga Meghalaya nung adentsü.

Meghalaya aser Assam nungi cabinet minister temi tesemtem semdanga senzü aser technology balaka amshi.

State anaprong nungi teshimtet nübotem dennür Survey of India ajanga tesemtem tajungba kuli agütsütettsü.

Taküm January ita tatemlen state ana tsüngda MoU agitetpogo aser idangji mangatettep aliba tesem trok atema telemtetba agi aser ibaji Prime Minister Narendra Modi aser Union Home Minister Amit Shah dangi aben.

### Arunachal nung NSCN-KYA aser sepaitem khatep

Itanagar, March 7, 2022

(Agencies): Arunachal Pradesh kübok Tirap district nung India sepaitem aser NSCN Yung Aung (YA) telungpurtem tsüngda khatep.

"Yashi nikongdang Tirap district kübok Tapu Basti tesem nung NSCN-KYA

telungpurtem aser army khatep. Iba mapa maneni inyakdar" ta Indian Army ketdangstür kati ashi.

Maneni, Deobar nikongdangsa Khonsa anasa Kaapu nunga army aser telungpur tsüngda khatep.

Yasiung 6:00 ako meta army aser Tirap Police-i iba tesem nung telungpur 12 nungi 15 shi ka aliba osang angazük.

Ajisüaka, iba tatalokba nung Assam Rifles mesüra NSCN telungpurtem yiruba mesüra asüba osang kecha mali ta osang ajanga metetdaksü.

### Assam kaketshir 10 tashi Delhi tongogo



Guwahati, March 7, 2022

(Agencies): Ukraine nung anendaka aliba Assam nung kaketshir 10 tashi Deobarnü India tongogo.

Parnok züngsema Assam nung kaketshir 100 tashi India tongogo.

Kaketshirtem aruba osangji Chief Minister Himanta Biswa Sarma-i metetdaksü.

State sorkari Ukraine kübok Sumy yimti nung kaketshirtem anendaka aliba atema tebilemtsü abener aser parnok anir arutsü meranger, ta paisa ashi.

Deobarnü India-i aruba kaketshirtemji Sneha Deka (Guwahati), Mumshad Hujaef Uddin Ahmed (Nagaon), Ananya Das (Dibrugarh), Udit Bhattacharjee (Silchar), Devangan Barman (Silchar) aser Ahmed Nur Emrul Kayes (Dhubri) nung lir.

Ano, kaketshir asem Bhaswati Goswami (Guwahati), Mrigakshi Kalita (Nalbari) aser Saddam Hussain (Nagaon) nung New Delhi

tongogo, ta CM Sarma-isa metetdaksü.

State sorkari kaketshirtem Delhi nungi Assam-i anir arutsü atema mapa inyakdar, ta paisa ashi.

CM Himanta Sarma-i External Affairs Minister S Jaishankar den Assam nung kaketshirtem anir arutsü atema osang metetpela arur.

Ukraine nung anendaka aliba Assam nung kaketshir 222 indang tenüng agüja lir.

Külen, Chief Secretary Jishnu Barua tetuyuba kübok district administration temi Ukraine nung anendaka aliba kaketshir tsüraburtem den tongtepratepdar.

Centre sorkaria 'Operation Ganga' ta ser Ukraine nung anendaka aliba India nung anir arutsü indang mapa inyaker.

India-i Ukraine den kidanger lintüktem- Romania, Poland, Hungary, Slovakia aser Moldova nungi sensotem anir arur.

### Mizoram nung AR-i Rs 3 crore jenjang heroin apu



Aizawl, March 7, 2022

(Agencies): Assam Rifles-i Hombarnü Champhai district nung Rs 3 crore tema alangba heroin apu.

Champhai district kübok Tiau River anasa heroin gram 780

apu. Iba ya Champhai district nung 8 Assam Rifles sepaitemi apu.

"March 7, 2022 nü Excise & Narcotics Dept, Champhai nem heroin agütsüogo" ta AR-i metetdaksü.



## TIR YIMYIM YIMOBILEM (EDITORIAL)

DIMAPUR SANGTENNÜ, METSÜREMI (MARCH) 08, 2022

### Ochi ya light bill nungi tenzükdi

**A**senok taküm alitsü atema nungdakbatem mopong, tzü aser anü sangwa serbo electric light ya asütsü. Tanü putu nung asenok mapa tulu aser tasak melamelaa inyaksüsa kümdaktsüba ajak ya electric light tashi ajanga lir. Asenok anogo shia nungdak industry tapu balala nung yanglua adokbatem dang masü saka tanübo light tashi melira soruchioka mechiyongtettsüsaba tia ka nung asenok lir. Iba ama tongtibang nungdakji meteta asenok kidang aser mapa inyakdak light atsükertemia light kanga meyaka (apayua) atsüksü aser asen taküm aser lokti nung ochishia inyak tenzüksüba light bill shitak agütsüba nungi tenzüksüla. Joko, Nagaland nunga tsüket nung alir kar dak alaka takar sensaker, tulu tilar kecha mali, ki ajak nung light enoka lir, anungji asenok kibong ajaki light auyaa matsüksü telemteba tajung agir, ita shia light bill shitak agütsü tenzük nungbo, Nagaland ochishir lima küma asentenshi tulu tenzük asütsü. Ashiko, electric light atsükba nung ochimashi mapatem ya light atsük nübortemi dang masü saka Power department nung inyaker ketdangsertemiang tuluba auyaa tsükaa alitsü akok. Ano, tesem kar nungbo, ashiko department nung inyaker o light atsükertem na tangatettep nung meter box dena meinok ser light tsüka alitsü akok. Item ama ochimashi mapatem, koba agi Nagaland kongradaktsür, ajakji toktsür Power department nung inyaker temi anir llight tajemtiba atsükba kibong tashi light bill nung mauyai ochishia government nem shitak agütsütsü aser iba senji government-ia shitak amshitsü ta Nagaland nung ochi ya light atsükba, light bill agütsüba aser light bill nungi aruba sen amshiba nungi tenzük tetra, kibong aser mapa inyakdak ajak nung asentenshi adokba mapangji aji asütsü. Atangji, iba ama ochishia light atsüksü aser light bill agütsütsü atema center government nungibo Power Ministry ajanga tang asenok light tsüka lir ita tatem nung agütsüba inyakyim ya anener, joko light matsükdangyongi jelia asen nungdak yari sen agüja atatsü asoshi 'Prepaid metering system' tenzüksü ozüng agüja lir. Iba inyakyim tasenbaji Dimapur nungbo kiyong kar nung tenzükogo aser ajaki inyakyim tasenba nungji kanga temulung süa light tsükdagi. Mobile phone-a tamasa sen agütsür-ang amshiba ama, electric light-a tamasa sen agütsür atsükba inyakyim nungji light auyaa atsüksü makoker aser power department nung inyaker tema ki shia light bill yanglur külenang agüja senzütsü nungdak madoker. Ano, light atsükertem asoshi tajung kaji, ki ka nung ita piyong kenyongi light matsük ser süidaktsüra light bill senjang kata madoktsü, ajisüka tangbo light kenyongi matsükyonga 'minimum charge' bill kabo arur. Ano, light nung inyaker tema aser light atsükertemi shitak meinyakba kaji, kibong aika nung light atsükyonga-matsükyonga light bill-bo kasasa arur. Item ajakji meter box dak keta lir. Iba jagi government takoksa angur. Item mekokmein ajakji toktsür ajaki shitak inyaksü atema tang nungibo asen lima nunga dena 'Prepaid metering system' tenzük. Iba inyakyim jagi nisungtem nem light jenjang tajungba angatetdaktsütsü aser nisung shingaia mashi nung light metsükdoktsü, iba jagi alima tatsükba küma aotsüba nungia kümzüksü. Joko, yimya sübadokerji asenoki inyakyim tasenba nungji manidaknüsü, kechiyong tangbo asenok aikati light ya angati arur amai bilema anungdanga atsük. Ajisüka, asenoki anidaknü manidaknü ta masü, joko asenokbo koba ochi, koba shitakba aser koba agi asen lima topur junga renloka aotsü ta asüba nung mulungsua anidaktsü tim. Joko, küm anasemka tsüngda kibong ajak "prepaid metering system" agi melentsü, anungji asenoka ajaki tashi angaa ochishia light atsük tenzüksüba sentong nungji anidaktsüla. Alima tainba aser tekaraba küma renloka aodang, electric tashi tenungdakba akümer, iba amaji nungdakba yari asen lima nunga asen peribo electric light tashi ngutettsüsa government-ia inyak meshiogo. Asenokbo sen, jang aser light tashi ajak tangar nungi dang meshitsü bilema ayongayonga shisamebului ali nungbo, memenui ayongayonga tangar lar kümer alitsü. Asenok shisabulutsüla, meranga aser ochishia inyaksüla aser asen meyong rongsen apayua amshitsüla. Itemji asenoki light meyaka atsükba aser light bill shitak agütsüba nungi tenzükdi.

## OLEMSABANG

### ASÜNG JENJANG ATEMA TANÜ TETZÜR TEBUR KASA LIROMEDEM

~ Mrs. Mapukala Pongen . Rtd Teacher,  
Merangmen Tzurangkong

Tsüngremi mezüng nisung ADAM yanglu, Pa mesükba nung. Nisungji kija alitsü majung ta repringtet nung, Tetemsü teyarir ka yangluti ta shisateta EVE yanglu. Ibai teyanglur shisataka mapaji liasü. Alinük sünga ayimzua aliba ya, Tetsürtem melilasang koma süla. Meimchiri aiben pei ajung asar, kü kijai ajak akoktsü ta pilemer. Saka tesülen meyipa repringshir, tejaklen anogo benzütsü koda? Süia aruba pututem, shilua penzüdangra jangratemtsüka. Teburtem tongpangi ora Tetsüri tasü aitsü ajongmeso. Keyi , Pongzü asadang, Arür kolak bener arudang tetemsü teyariri , Ori-ri atena par alang konang ken mejema tenloksüdang, Tali tasü ait. Tongpoka moutetba kuret nung Tetsür tasa ajanga, Takok konang jendi Watsürlar ajanga angutet. La atena yong. Abenjaki aki putu nunga Tetsürtemji mesen metu-i amshia maru. Aujaito ! Kibong nung tekolakji Tebu, ajak nung lenir-ji pasa. Tebu ka-ji Nabal ama yazü majung asütsü akok, Saka par aküm nung Tetsü aser chirnur alir. Tebu melira jara maliba ki ka dang mesüka alitsü. Tulutsüra süang, tashitemetetera süang, tepuatsüsa tepur jungang, Office nung tekolaka süang, kinungbo dang na tuluba masü. Nai na angatetang, asüteküm, Tetsürji Tsüngremi teyarir asütsü yanglu. ABHRAM dang SARAI Kibur ta ja-a tenzük. Saka tanu Yarimia-i aienkeri zülubaji, linük nung tesüngmangtsü ka ataloka lir. "Tetsüri Tebur kümzük" yabo tipelem dangtsü tulu lir masü na? Teburtem ! Ya Tsüngremer shin mangdang ataloka arur masü no? Tanubo shisaluyim aser Teburi inyaketba, otetba mapa ajak nung, Tetsüria kesa shilem agiteta, jenjang tajungba nung aoba mangur no! Israil nunger küm 20, KANAN nunger kübok reshikangshi dang Deoborai anir, Tongpangji akok. Tanü-a Watsürla dak ochi, tekümküm shisatsü lirko... Senso tajungtem, Tetsürtem talenba salajang, onoka apusodi. Tetzür Tebur kichia palala mali, Tsüngrem mesükba nung kesasa yanglu. Kijai makokba tongpangji Tetsürtem tenra koktettsü. Yimden aser Arogo kichia tependang makai onoka züngokang. Pakistantsür Malala Yousafi-i ashi medem, Tetsür Tebur külemi shilem magira kodanga takok mangutsü. Alima nung tashi tulu ana lir. Pen , Noklangnok item dang tetzür tashi tuluba. Tanü Teburtemi Tetsür teyarir tajung ama züngokra, Asüng lanur putu Tetsürtem jenjang ajungkettsü masü na ? Joko Tetzüri yimsütsüba aser rongsen ketzüng nung tangar menepogo, Bendang lima palala oa shisatsü anetba nung Tebur den kesa oteter. Mapa ajak nung Tebur dang nungi tenendakba Tetsüri inyaketeter. Tetsür ola medeni lokti ajak nung yimjung mali. Mapang agi sembeter-ji office, lmden, Arogo nunga Tetsür maden mali. O !Watsürlartem, ola atokang, tashiyim agi masü tamang agi. Tsüngrem tsübuba jagiang kin ka ajongkettsür. Tanü aseni kichi mekazüka ayur ,aji tarutsü Watsü,kongro asoshi. Alimai nü dak tepuatsü sembet angur. Ya asen mongchen tejangja. Akibo Tetsür jenjang maka ta züngdok. Tagidak mali ama pilem. Alima süneptsür na kanga nungdak kümogo tanübo. Watsülar maden küla arangshi lonzük maka koda süla ? Arung alima asoshi tongti samanir südi. Tetsüputsü melika. Asen mera jungjunga ajongketogo...Washiti asen mongchen maitsüli. Küm kümshir, tasü itshir, alima den tsüngkang medema, Asüng lanuasensortem satem...satema aowa oa inyaksü, Tanü ya asen teinyaksü wadang masü no? Kinük pezü sülenji aka-asor penzüdangang ta, Tanü kongro , Watsürlartemi ayimoktsür ani...

## Clean Election Yimyim

~ Tayongtemjen Lemtur

(Yashi adok nungi...)

**Arogo/Tamanger asoshi Election Tongpang:**

Arogo-i inyaksü mapa kar Ochimashi (corruption) tera ya tanga tashi kechaia makoktsü saka moral transformation ajanga dang akoktsü ta bilemer. Kotaki aotsü indang sayuaka asenoki KODA kotaki aotsü iba tesayubabo kanga anünga agütsür. Temeim aser tai toktepbaji tajung saka iba kisüng yagi dangbo Lai tesayuba mabensar. Yisui noklangnok bener aru ta ashibaji ochi latettsü aser ochi agi nür-ozü ta mebendang tai dang tai, shitak dang shitak ta jembitsü/inyaksü asoshi lir. Tsüngrem nungi ochi asoshi tasü tait tanela meshia nüburtem nem ochi tesayuba peria agütsütsü nungdaker. - Menji Jamir

Clean election takok nung mezüngbubaji nisung temulung meyiptsüla. Tsüngrem dangi temulung memeyip tashi clean election takok mangutsü. Clean election nung arogo mezüngbuba shilemji nüburtem Tsüngrem dangi meyipdaksüba asütsüla. - S. Among Longkumer

Tsüngrem O nungi tesayuba: Arogo nung tamanger asoshi election nung shilem agiba ya democracy-i melaba aser Lai tesayuba ta angatetdaktsütsüla. Ano tamanger asoshi election nung shilem agibaji temeshiba aser ochi kulisüba mapa. Yimsütsüba mendenji Tsüngremi mulungba mapa. Ano yimsüsürtemji nüburt asoshi tajung inyaksü Tsüngremer kilirtem ta shia lir. Rome 13:1-7. Arogo aser ABAMI temeshi taküm indang jangja jangja sayutsüngitsüla.

Yimden aser civil society den apu alaba: Arogo-i clean election nung takok ngua mapa inyaksü asoshi yimden aser civil society den lungjemer mapa inyaksüla. Aiben election mapang yimden yimsütsüba ajanga temzüng ozüng aika yanglur. Ozüng koba ajanga teraksa bener arur itemji Arogo ajanga tuteta melenshitsuatsüla. Clean election takok angutsü asoshi Arogoji dang masü yimden yimsütsüba mendenjia ochi nung noktaka alitsü tim.

Temesüpba Yi anema noktaksüla: Temesüpba yi ya election mapang tashiyim agi election akoktsü merangertem asoshi tactic lir. Yi ajanga lokti menentsür aser rarapangsen buludaktsür. Election nung yi amshiba yimya ya Arogo aser yimden telungjem ajanga anendaktsütsüla.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Mon Town Ao Baptist Arogo nung sannüker den tepila sentong agi



**Mon, March 07 (TYO):** March 6, 2022 anogo nung Mon Town Ao Baptist Arogo nung sannüker Rev. Lipoktemjen mapa nungi anisüngzükbaja sentong agia liasü.

Tepila sentong nung tepela aser salem o jembidang Rev. Lipoktemjen-i, pa Mon Town-i arur küm 30 tashi lia arudang Arogoi pa aser par kibong dang ajungba aser meimba asoshi temulung taroktiba

nungi pelar, ta lemsatep. Arogoi pa ordained sütsübaji par kibong asoshi maongka aser temoatsü tulutibaji aji lir, ta paisa shisem.

Mon Town Baptist Arogo tenüng nungi jembidang tenzüker Rongsen Imsong-i ashiba agi Rev. Lipoktemjen küm semer tashi tenzüka arudang tensa tia balala ajak kokteta arur sannükba mapa nungi anisüngzükbaji alizüng

atongba lir, ta tepelaba o den tenüngsang agüja liasü.

Iba sentong Tizit Ao Baptist Arogo sannüker Lima-i sarasademer tenzüker aser "Tenzükba mapa nung ajemdaker Rev. I. Wati Jamir, Pastor Changtongya Baptist Arogo-i Tsüngrem o jembi. Kasa sentong nungsa Baptist Pastor Fellowship Mon Town (BPFMT) nungi shilem agia liasü.

# Russia nung Khristan putir 280-i Ukraine amakba anentsü mepishir

**March 07, 2022:** Russian Orthodox Arogo nung putir 280-i Russia-i Ukraine amakba ya anentsüla, kechiyong tatembangbuba obendangji nisung ajaki ajurutsü, ta metetdaksü.

tekangshi ang ajurutsü," ta parnokki metetdaksü.

"Russia aser Ukraine naprongla nungi sepaitem kecha meyrui pei kidangi oa kibong züngsemtem ajurutsü atema onoki sarasademtsür," ta parnokki metetdaksü.

metetdaksü.

World Council of Churches nung general secretary, Rev. Ioan Sauca-i Russia nung Orthodox Khristanem dang, "Tang ama teimla maliba mapang ka nung yimjung atema nisung aikati nenok dak teimla angutsü. Yimlibilema nenoki ola adoktsüla aser asen adianutem tenüng nung jembitsüla," ta mepishia metetdaksü.

Russia nung putirtemi yimjak shidi ka ajanga, "Ukraine nung asen aianutsürtem aser adianutem asüba atema onoki mangyimer," ta metetdaksü.

Osang angazükba agi, February 34, 2022 nü Russia sepaitemi Ukraine amak tenzükbaja sülen tang tashi nung Ukraine nung civilian 351 süogo aser 700 dak tema yiruogo, ajisüaka asürtemji iba dang nungjagi timba asütsüa akok, ta U.N. High Commissioner for Human Rights office ajanga metetdaksü.

Ano külen Russia nung aliba Evangelical Arogo nungia pastor aser putir 400 dak temai Russia-i Ukraine amakba aitsüba shidi ka nung sign süogo.

Evangelical Arogo lenirtemi shidi ka ajanga, "Ozü (Russia) sepaitemi tanga linük ka (Ukraine) amaker, bomb aser rocket amshia Ukraine kübok yimitem amaker. Tamangertem ama iba ya adianui adianu anema inyakba menen ka ama onoki züngshir. Iba ya Cain-teno Abel anema apusoba ama lir," ta metetdaksü.

Osang angazükba agi, Patriarch Kirill aser Tir, Putin na kanga junga metettepa lir.

Ukraine nung rara ajanga nisung million 1.25 dak tema jenshiogo, aser iba ya World War II sülenborara ajanga linük ka nungi nisung timtba jenshiba lir, ta Honibarnü International Organization for Migration-i metetdaksü.

"Tai maket nisungtem tepsetbaji yimtenren mesüra nükjidong kecha agia medentsüsü makok," ta Arogo lenirtemi metetdaksü.

Russia nung Khristan putirtemisa, "Nisung ajaki tatembangbuba obendang ajurutsü," ta ashi.

"Alima nung kecha tashi agia, doctor tem aser tanükertem shingai na iba obendang nungjagi meküzmüksü. Russian Orthodox Arogo-i nisung ajak tekümtet angutsü atema bilemstür, aser iba obendang majurudaktsüner," ta parnokkisa ashi.

"Azü tokshiba dak alia nüchiso ngua aliba linük Ukraine amakba ya par sensotem anema inyakba mapa lir. Asen nüburttem tsüngda tesempa proker, aser iba ya ajanga tarutsü putu aika linük ana nüburttem tsüngda tsükchiteptsü. Iba rara ajanga Ukraine dang masü saka Russia nungertem, rongsenkettsüng aser tarutsü tia raksatsür," ta shidi nung shia lir.

China kübok Dalian yimti nung tetsürla jagi linük yimtiba, Beijing nung Tir den Khrista osangtajung lemsateptsü merangba atema ktdangsertemi la puogo, ta International Christian Concern (ICC)-i metetdaksü.

China kübok Dalian yimti nung tetsürla jagi linük yimtiba, Beijing nung Tir den Khrista osangtajung lemsateptsü aiben meranga liasü, ibayongji police-i la apu aser Liaoning province-i yokogo.

February 20, 2022 nü Zhou Jinxia-i Communist Party of China aser State Council of China central headquarters aliba tesem- Zhongnanhai-i oa ozülü ka amer China Tir, Xi Jinping dang Yisu Khrista dak amanga agizükang, ta ashi.

"Alima nung meimchirtem atema Yisu Khrista zü tokshi, saka nisung tepsettsü tuyurtemi taküm masü saka tatem maka

iba rara anema ola adoktsüla, ta

Iba mapang nungji police-i la apu aser Dalian police-i la Dalian-i meyipa anir ao.

# ANO GO ABEN TSÜNGREM DEN

## Jungtepsia liang

Tenladak madak ne tenla tokjang aser oang, aser tamasa ne adianu den jungtepa, ajiser arung aser ne tenla agüjang. Mathi 5:23,24.

Ne adianutem den tsükchitepa yur tenla agütsübaji tagizükettsü tenla masü. Yisui Pa sülen anidakertem dang kar anema langka ta lira parnok den jungtepa ta ashi. Alima telemtetba ka yur jungteptsü bushir Khristantemi kechi südir süaka jungteptsüla.


Nenoki ashir, "Saka nenoki ashir pai ni koda yirutsü nai memetet! Onok tesendaktep jungshiteptsü kuli maka." Mesüra, "Ni merangogo saka lai au masü." Jungtepa alitsü asoshi Yisui talila o meinoki. Ne tsükchir dang meimang ta dang Yisui ashi (Matt. 5:44). Pai na rishikangshira pa dang meimang. Pa atema sarasademjang ta dang ashi (Matt. 44). Yimjak nung na mak südaktsüra nai meyipa telangzü (t. 39). Kari ne dang langka meshira talila agüjang (t.41). Alimai sayur "Na atema liang." Yisui sayu, "Ne sasa tila kümang."

Na ajemzüktsütsü ta alimai tekümdangtsü agütsür. Yisui Pa nütsüngtem dang junga benshitsüla ta meblem saka parnokki ajak den jungtepa alitsü bilemstü. Nisungi pa dak metsü metsüloksü aser kangki nung angenlok. Pai kechi langzü aji asenok yimya (model) lir: "Oba, parnok dang tai tokang, kechiaser parnokki kechi inyaker aji parnokki memetet (Luke 23:34).

Idakji maneni ozüng raksaba lira aser tashi mangaba lira, ibaji jungteptsüla. "Ni mapatem shidak inyaksü meranger, saka kü tsükchirtemi magizüker" ta asen sasa bilema asenoki tiplama alir. Tsüngrem Oi "Jungtepa alitsü merangang" ta mashir saka, "Jungtepa" ta ashir. Kar den na yimjung nungdaka lir asü? Süra Tsüngrem ashiba ama inyakang.

# China Tir, Xi den Khrista osang lemsatsü meranger tetsür ka apu

**March 07, 2022:** China nung tetsür kati China Tir, Xi Jinping aser pa kinüngtsü, Peng Liyuan na den Khrista osangtajung lemsateptsü merangba atema ktdangsertemi la puogo, ta International Christian Concern (ICC)-i metetdaksü.



ben dak tali meranga liasü. 2015 küm March ita nunga la tepuokdak anogo 10 nü ayu. Iba sülen 2016 küm March aser 2018 küm March ita nunga la pua liasü.

China kübok Dalian yimti nung tetsürla jagi linük yimtiba, Beijing nung Tir den Khrista osangtajung lemsateptsü aiben meranga liasü, ibayongji police-i la apu aser Liaoning province-i yokogo.

February 20, 2022 nü Zhou Jinxia-i Communist Party of China aser State Council of China central headquarters aliba tesem- Zhongnanhai-i oa ozülü ka amer China Tir, Xi Jinping dang Yisu Khrista dak amanga agizükang, ta ashi.

Iba mapang nungji police-i la apu aser Dalian police-i la Dalian-i meyipa anir ao.

Küm shia March ita nung Beijing yimti nung Lianghui (senden ana) ayongzüka agir, aser iba mapang nungji linük tesem balala nungi nisung meyrjang aika adenshia National People's Congress aser Chinese People's Political Consultative Conference nung adener, anungji nisung longsoa adenshiba mapang nungji lai China Tir den Khrista osang lemsateptsü meranger.

2020 küm October ita nungi tenzüka la Beijing nung Fengtai district kübok Xiaobailou yimdak alir aser lai osangtajung lemsatepa den külemi lar Arogo nung shilem agia inyaker.

OLONG PAITEP # 6104

Grid for Olong Paitep # 6104 with numbers 1-25 placed in specific cells.

- TIPILEN and LANGTSÜNGLEN lists for Olong Paitep # 6104. Includes items like Saku, Songjen, Mali/Tazüng, etc.

OLONG PAITEP # 6103 TELANGZÜBA

- TIPILEN and LANGTSÜNGLEN lists for Olong Paitep # 6103 Telangzüba. Includes items like Anükalem, Mesak, Apet, etc.

AOLI AROGO KA NUNG OLULU : Deaconba, Sobangba, Warakla, Polokba, Alokba, Moral. Lilir : WhatsApp

TANÜBO NAI LANGZÜANG

Q. 'How Indians View Gender Roles in Families and Society' ya \_\_\_ institution ajanga sayaba report ka lir? [A] NITI Aayog [B] UNICEF [C] Pratham Foundation [D] Pew Research Center

YASHI ADOK TELANGZÜBA : Ministry of Tourism

AO OSHI ANGAZÜKDAK:

TANÜ ANGAZÜKTSÜBA OJANG



Merongtep

(adv) nongtepa nokdak (Standing closely in group)


\* Nisung aika merongtepa nokdaker asayaba repranga liasü.

Merongtep

(adj) yin tatsük agi memenatepdaksü (not welded)

\* Parnoki kishi yanglutsüba yin merongtep bener aru.

NAI-A YA METETTER MA



1986 küm March 08 nü Comic Relief charity atema The Young Ones (Rik Mayall, Adrian Edmondson, Nigel Planer, Christopher Ryan) aser Cliff Richard' ajanga "Living Doll" ken indang version tasen ka saya.

SUDOKU # 6143

TELANGZÜBA # 6142

Sudoku grid for # 6143 and Telangzüba grid for # 6142.

OJANG LUTEP # 5689

- BZÜO, TAKE, TSYIRUÜBA, NGDA, GIBNUNO, ANTEBG, GAI, ANTLUNEMUGJG, YISÜRUTBA, BATESASHI

OJANG LUTEP TELANGZÜBA # 5688

LOKTI RENLOKTSÜ ASER TEJAKLENI AOTSÜ ASOSHI YIMJIYIMJUNG ASER TELONGJEM NÜNGDAKER

TAN HOPTA ATEMA - KOMA SÜLA ?

Q. Center government-i aginüba ama, tendanga, Nagaland nunga tetsürtem atema menden 33% shiteta yutsür municipal aser town council election agi nunga koma süla ?

### Jan Aushadhi Yojana ajanga sensakeri dialysis angati agi: PM Modi



New Delhi, March 07, 2022: 'Jan Aushadhi Diwas' anogomong nung Ato kilonser, Narendra Modi-i 'Jan Aushadhi Yojana' scheme ajanga tajangzük angur tetsür ka den jembidang tangokba noksa nung angur.

**New Delhi, Metsüremi/ March 07 (Agencies):** Sorkari sensakertem dak rangloker inyaker, ibayongji tanübo Jan Aushadhi Yojana scheme kübok sensakertemi dialysis angati agiteter, ta Hombarnü Ato kilonser, Narendra Modi-i metetdaksü.

Paisa, iba scheme kübok sensakertemi jenjang dalang agi mozü aika aliteter, ta ashi. Jan Aushadhi Diwas anogomong nung Ato kilonser, Modi-i "Iba sorkar yagi

sensakertem anepalur. Cancer, diabetes aser TB ama tashidak balala atema mozü 800 dak tema jenjang dalang agi angur," ta metetdaksü.

Modi-isa 'Jan Aushadhi Yojana' scheme ajanga tajangzük angur ka dang iba scheme ajanga nai tajangzük koma angu? ta asüngdanga liasü.

Ibaji langzúa lai, "Tamalenbo mozü alidang ni sen 1,500-1,600 shi indoka liasü, ajisüaka tang iba scheme kübok sen

250- 300 shi dang indoker," ta ashi.

Jan Aushadhi Kendra scheme ajanga tajangzük angurtem den jembidang pai, Jan Aushadhi Yojana ya social media ajanga nüburtem den lemsatepsüla, ta ashi.

"Nüburtemi iba scheme indang oren aser videos oshi balala nung adoka lemsatepsüla. Iba scheme ajanga middle class purtemi sen aika kümzüksü," ta paisa shisem.

### March 31 nü state 6 nung Rajya Sabha menden 13 atema election agitsü

**New Delhi, March 07 (Agencies):** March 31, 2021 nü state trok nung Rajya Sabha menden 13 atema election agitsü, ta Hombarnü Election Commission-i metetdaksü.

Item menden 13 ya April ita nung azüngtetsü aser Rajya Sabha nung kümsük abensartem rongnung Congress lenir ana- A K Antony aser Anand Sharma na densema lir.

Assam, Himachal Pradesh, Kerala, Nagaland aser Tripura state tem nungi Rajya Sabha züngsemtem kümsükji April 2 nü abensatsü aser Punjab nungi Rajya Sabha züngsem pongu kümsük April 9 nü abensatsü, ta

Election Commission-isa metetdaksü.

"Punjab nung Rajya Sabha menden pongu nungjagi menden asembo tan election agiba ajanga shimtetsü aser tanüngba menden ana atemabo tanga election ka nung ang shimtsü, kechiyong item menden ana jibo kümsük balaka lir," ta EC-i metetdaksü.

Tanüngba menden ana atema election agitsü anogo March 14 nü sangdongtsü.

March 31 nü election agiba sülen kasa anogo nungjisa nikongdang 5:00 ako nungi tenzüka vote azüngtsü.

Rajya Sabha nung kümsük

abensartem rongnung Antony (Kerala), Sharma (Himachal Pradesh), Pratap Singh Bajwa (Punjab) aser Naresh Gujral (Punjab) nung lir. Taoba mapang defence minister Antony, Rajya Sabha nung Deputy Leader, Sharma aser Bajwa nung ya Congress party nungi lir aser Gujaral ya Shiromani Akali Dal (SAD) nungi lir.

February 20 nü Punjab nung assembly election agiba osang March 10 nü sangdongtsü, aser election osang nungji ajemdaker party temi Rajya Sabha election atema candidates shimtsü.

### PM Modi-i Russia Tir, Vladimir Putin den phone ajanga jemb

**New Delhi, Metsüremi/ March 07 (Agencies):** Hombarnü Ato kilonser, Narendra Modi-i Russia Tir, Vladimir Putin den phone ajanga minute 50 shi jembidang tenati tang Ukraine tensa dak sendakba nung o lemtepogo, ta ketdangsertem osang ka ajanga metetdaksü.

Russia Tir, Putin-i Ato kilonser, Modi dang Ukraine team aser Russia team na tsüngda ken o jembiba

tongmelang agi metetdakja liasü. Narendra Modi-ia Russia Tir dang linük ana nungi team tsüngda jembiba denji külemi nai Ukraine Tir, Zelensky den-a indangindanga jembitsüla, ta ashi.

Modi-i Russia Tir dang Sumy yimti densema Ukraine tesem kar nung rara anentsü sangdongba aser nüburtem aienshidaktsütsü atema lenmang lapoktsüba asoshi pelaba lemsatop.

### Takok angutsü atema BJP-i tim masüba inyaksü akok: Rakesh Tikait

**Muzaffarnagar/New Delhi, March 07 (Agencies):** Hombarnü Bharatiya Kisan Union (BKU) otongdar, Rakesh Tikait-i, March 10 nü Uttar Pradesh assembly elections vote azüngba mapang nung BJP-i takok angutsü atema tim masüba mapa inyaksü akok, ta ashi.

Hombarnü Rakesh Tikait-i Muzaffarnagar kübok EVMs yua aliba Navin Mandi semdangba sülen osangbenertem den jembidang pai, March 10 nü vote azüngdang Uttar Pradesh nung ruling party-i takok angutsü

atema tim masüba mapatem inyaksü akok, ta ashi.

February 10 nü UP election mezüngbuba shilem nung Muzaffarnagar, Budhana, Pyrkazi, Khatoli, Murapur aser Charthawal assembly constituencies nunga election agia liasü.

Ano tanga osang ka nung, additional district magistrate & additional election officer, Narendra Bahadur Singh-i, vote azüngbaji tesünep nung ochishia azüngtsü; Election Commission of India (ECI) tetuyuba kübok security tashi itta alitsü, ta metetdaksüogo.



Tawa Ukraine nungi jena aruba India tsür kaketshir, Kritika-i vote agütsüba sülen tangokba noksa nung angur. La ya Uttar Pradesh kübok Cantt Vidhan Sabha constituency nungi lir aser tanü (March 07) UP assembly election tatembangbuba shilem nung lai vote agütsüogo.

### India nung Covid third wave tembangogo

**New Delhi, March 07 (Agencies):** India nung coronavirus wave tasembuba tembangogo; February 28 nungi March 6 tashi nung linük nung nisung 42,000 dak dang coronavirus puteta liasü, ta osang ka ajanga metetdaksü.

Iba dak alia India nung

coronavirus agi shirangertem asüba-a kanga ajema kümogo; tesüiba hopta ka tsüngda iba tashidak agi shiranger ajak senteper 626 dang asü. Covid wave tasembuba mapang nung nisung timtiba asübaji January 31 nungi February 6 tsüngda liasü (4,355 asü).

Amongnü India nung nisung 4,500 dak dang coronavirus puteta liasü aser ibaji 2020 küm May 15 nungi tenzüka tang tashi nung anogo ka kija nung ishitiba dak iba tashidak putetba lir. Tang India nung coronavirus agi teshirangdakpur 55,500 dang kümogo.

### 2017 küm ama mataloktsü atema Cong-i Chidambaram Goa-i yokogo

**New Delhi, March 07 (Agencies):** 2017 küm Goa nung assembly election agiba sülen atalokba ama tanaben mataloktsü atema tanbo Goa election vote mazüngdangyongi Congress-i P Chidambaram Goa state-i yokogo, ta osang ka ajanga metetdaksü.

Teloktep party tem den jembitsü atema Congress lenirtem Goa nung adenshi tenzükogo.

Goa desk in-charge, Dinesh Gundu Rao aser party atema election asalentong yanglur, P Chidambaram na Amongnü Goa tonga ogo aser tenati independent MLA tem teyari bushitsü atema maparen tenzükogo.

2017 küm Goa assembly election nung single largest party ji Congress liasü saka parnoki

iba maongkaji magitet aser BJP-i sorkar tenteta liasü.

2017 Goa assembly election nung Congress-i menden 17 nung takok ngua single largest party liasü, aser BJP-ibo menden 13 dang angu. Iba sülen sorkar akümtsü atema Congress aser BJP napronglai party tilatem teyari bushi.

Goa nung BJP-i Goa Forward Party (GFP) aser Maharashtrawadi Gomantak Party (MGP) naprongla nungi MLA asemsem aser Independent MLA ana teyari angu, aser ibaji ajanga menden 40 aliba assembly nung teloktep MLA ajak senteper BJP leniba nung sorkar aküm.

Goa assembly nung menden 40 lir, aser sorkar akumtsü atema majority mark ji 21 lir.



March 07, 2022 nü Uttar Pradesh nung assembly election shilem tatembangbuba anogo nung Varanasi nung aliba polling booth ka nung voters tarensena nokdaka aliba noksa nung angur.



Moscow, Mar 7 : Ukraine nung Hombarnü Special Military Operation mapang tangokba noksa ka nung Russian Su-35 fighter jets tem angur.

## Syria yimtiba anasa Israel-i civilian ana tepset

**Damascus, Metsüremi/March 07 (Agencies):** Syria state media ajanga ashiba agi, linük yimtiba, Damascus tezülen Israel-i missile amshia amakba nung civilian ana asü aser ki-o-jen raksatsü.

Israel-i Damascus south tsütsü Hombarnep 5:00 ako (par mapang) meta amak tenzük, ta Syria sorkar meyong SANA news agency ajanga ashi.

"Air defence system ajanga missile timba khazüka yok," ta SANA ajanga ashi.

"Civilian ana asü aser ki-o-jen kar raksatsü," ta ashi saka komasür asüar ajibo memetdaksü.

UK nung amenoka aliba

Syrian Observatory for Human Rights (SOHR) ajanga ashiba agi, missile tem yagi Damascus International Airport anasa Iran-i yariba militia temi amshiba nok-o-nü aser hadir ayuba tesem nung kongshia liasü.

SOHR ya Syria telungzük nung tesendaktep balala nung metaloka alir aser parnoki civilian asüba indang mejangjatet.

Küm tenzük Israel-i Syria nung tenetben tashi makogo, ta SOHR ajanga ashir.

Taoba ita Israel-i Damascus anasa amakdang Syrian sepai ana aser Iran-i yariba militia züngsem pezü

asü, ta SOHR ajanga ashi.

Syria nung 2011 küm rara tenzükba sülen Israel-i iba linük telung nung tayimtsü amshia noklang aiben makogo aser iba mapang sorkar meyong tesemtem aser Iran-i yariba Shia telok Hezbollah züngsemtem dak tenük yoker amaker.

Iba ama operation agiba ya Israel-i aiben menanzükter. Tang tesüsa amakba atema kecha sangdonga mali. Saka Syria Tir Bashar al-Assad indang sepaitem yaria rarar telok, Hezbollah ama Iran den sendaktepa aliba militia tem amenoka alodak amaker, ta Israel-i ashir.

## Russia-Ukraine rara mechi totzú jenjang atur

**Metsüremi/March 07, 2022 (Agencies):** Ukraine nung rara tesashiba akumba mapang aser Russia anema tenokdangba tali agütsütsü jembiba ajanga totzú tazü (crude oil) barrel nung sen \$10 (India nung sen 768 dang timba) dang tima temlokogo.

Hombarnep Brent crude oil ya sen \$10 dang timba temlok. US nunga sen \$9 jungnüa tali kuma barrel nung sen \$124 dak tali agi ayoker.

Russian sepaitemi tongtipang tesemtem agia aoba mapang Russia Tir Vladimir Putin-i Ukraine linük timtemi aitsü, ta ashiba sülen totzú jenjang ya timba akum. Hopta tatemlen Ukraine yimti ana nung khen atema ceasefire benoktsü merangba takok mongutet aser linük ana tsüngta kati ka aitsüteper.

Ano Libya indang national oil company ajanga sangdong ka nung telungpur telok kati totzú atsüba tesem tongtipang ana shibangtsüogo, ta ashiba sülen totzú jenjang nungya kongshitsüsa akumer. Iba tesem ana shibangtsüba ya ajanga linük nung anogoshi totzú atsüba barrel 330,000 agi ajema akum.

Russia nungi totzú aser energy product tem United States-i alizüka bener aruba densema global economy nungi Russia tali senzüka yutsütsü atema House nung lenmangtem bushir, ta US House of Representatives Speaker Nancy Pelosi-i shia liasü.

Anepdang menua tashinung Tokyo nung US crude ya barrel ka nung sen \$9.08 temloka \$124.74 liasü. Totsü jenjang timtiba ya 2008 küm July ita liasü aser iba mapang US crude ya barrel ka nung sen \$145.29 liasü.

Anungji US nung petrol ya gallon ka nung sen \$4 dang timba akumer, koba 2008 küm tonga liasü. Teti amshiba petrol jenjang ya cents 41 jungnüa agi timba akum, anungji Deobarnü US nung gallon ka (3.8 litres) nung sen \$4 liasü, ta AAA motor club ajanga ashi.

Petrol jenjang timtiba ya 2008 küm July 17 nü liasü aser iba mapang gallon ka nung sen \$4.10 liasü.

Brent crude ya international pricing standard lir aser yangji barrel nung sen \$139.13 tashi atu aser Hombarnü tajemba akum. Hombarnü Brent crude ya barrel ka nung sen \$128.67 liasü.

Totsü jenjang timba akumba ya Japan asoshi takoksa tulu lir, kechiaser iba linük nung amshiba energy ajak amai bendang lima nungi bener arur. Anungji Japan indang benchmark Nikkei 225 ya shilem 3.5 ajema anepdang 25,091.93 nung liasü.

"Ukraine-Russia rara yagi market maneni amokbangtsü aser tangatetep kati arutsü yimyattem mangur, nungji mapang tatsüka yamai dang alitsü," ta Singapore nung market strategist Yeap Jun

## Ukraine-i Russia nem tatok magütsütsü: Zelenskyy



**Kyiv, Metsüremi/March 07 (Agencies):** Russia-i rara tenzükba ajanga asü-amaba aser timtemba atema Ukraine-i tatok magütsütsü, ta Ukraine Tir Volodymyr Zelenskyy-i ashi aser civilian dak tenük yokba atema Russia sepaitem aitsü.

Zelenskyy-i iba o ya "Forgiveness Sunday" nung jembidang ashi, aser Eastern Orthodox Church yimsü nung iba mapang kati ka dang tatok meshir aser iba anogo ka balaka lir.

"Asenoki tatok magütsütsü, asenoki mamadoktsü, asen li nung iba rara mapang mapa tamajung inyaker ajak asenoki merenshitsü. Iba alima nung leper dak alaka tesüngjem tesem kecha malitsü," ta

Zelenskyy-i ashi.

"Tanü Irpin nung kibong ka samaogo, kong tebur ka, tetsür ka aser tanur ana asü. Shooting gallery nung ama parnok lenmang tiyong nung khaset, Parnok ya takum kumzüktsü atema yimti nungi aotsü meranger liasü," ta Ukraine tiri ashi.

Ukraine yimtiba, Kyiv tezülen aliba jila tila, Irpin indang mayor-ia pa nuk agi ngua nisung tain ana aser tanur ana asüba indangya shia liasü.

"Ibai dangar nem akumtsübu mesayuba mapa lir, parnok ya temenentem. Irpin rara nung lir, Irpin-i maneni rarar. Yimti shilem kar Russia nung kabu nung lir," ta Oleksandr Markushyn-i

Telegram nung ashi.

Russia-i Ukraine amak tenzükter anogo 12 jungaka anüolen linüktemi ola madokba atema Zelenskyy-i aija liasü.

Ukraine nung Russia-i February 24 nü iba rara tenzükba sülen tang tashinung civilian 364 takum samaogo aser 759 yirua lir, ta United Nations ajanga ashir saka asürtem ya iba dang nungi timba alitsü akok, ta ashir.

Moscow-ibo mitkartem aliba tesem nung dang tenük yoker ta ashir aser Russia indang taoba Soviet linük ya shinga den madentsü aser Russia asoshi timtem masütsü mechi 'demilitarisation aser de-Nazification' ajanga Russia oshi jembirtem kumzükta ayutsü nükjidong lir, ta nenshia ashir.

Linük ajunga makdoktsü tebilemba nung tamendak dak maliba o jembir, ta Ukraine aser Western linüktemi aitsür. Russian rongsenketzung jenjang mejungi kumdaksütsü aser Moscow-i amakba anendaksütsü mechi Kyiv indang tembar linük temi shishilempaba, bank aser takataiter anema tenokdangba balala agüja lir.

Russia-i tang inyakba yimya memelenshira Russia nung

totsü alibattem nokdangba densema ano temerenshi tali agütsütsüsa akumtsü, ta parnoki ashir.

Saka Russia Tir Vladimir Putin-i tenokdangba agütsüba ya rara sangdongba den sako lir ta ashi.

Zelenskyy-i linük balala dang Ukraine nung no-fly zone sangdongtsü nenshia ajungshi, koba NATO-i tang tashi meinyaker aser iba mera ya agira rara tuluba akumtsü, ta ashir.

"Asen aliba anung shibangtsü asoshi alima dak tashi lir," ta Zelenskyy-i Deobarnü shia liasü.

NATO allies temi tang tashi Ukraine-i akhangba no-fly zone atema marakzür aser US Senator Marco Rubio-i Deobarnü ashiba agi, iba mera ya agira nuclear aliba Russia den alima rara tasembuba tenzüktsü.

No-fly zone ya sangdongra Europe kisung masü saka alima ajunga nung timtem aser teraksa tulu alitsü, ta Putin-i amokmeren o shiogo.

Ukraine yimtiba nung Russian sepaitemi amaktsü teimla nung sepaitem renemshir aser parnoki tsükchir sepaitem aruba lenmang nung apu

meraksa ka anünga aliba poksatsü bomb yija lir.

Parnoki apu ya ajangtsü merangra Ukraine nungertemi poksatsütsü aser iba mapang tsükchir indang tank aika tzü telungi aitsü, ta sepai kati Deobarnü ashi.

Ukraine mitkar dang Russia mitkar tashi tuluba lir, saka par sepai aser volunteer temi kanga meranga aser tasü ita rarar. Honibarnü Kyiv nung volunteer tem mitkar den dener raratsü adenshia liasü.

Anüolen linüktemi Ukraine bu akumer aser parnoki Ukraine nem teyari balala aser nok-o-nü agütsür aser Russia nem tenokdangba jenti agütsü. Saka tang tashi NATO sepai kata Ukraine nung yoka mali.

Ukraine-i linük balala nungi 'international legion of volunteer fighters' ka tentetsü sentong yanglur. Nisung 20,000 dak temai Russia den raratsü atema pei sasa molungteta tenung agüja lir, ta Ukrainian Foreign Minister Dmytro Kuleba-i ashi saka yangji Ukraine nung kwi aliar mejangja.

Nisung million 1.5 dak tema linük yutsür ainshio, aser ibai World War II sülen Europe nung refugee timtem tekerartiba lir, ta UN-i ashir.



**PELABA LEMSATEPER**



Aso : March 16, 1922  
Asü : February 25, 2022

Lt. Nüngsanglemla (Mongsenyimti)

Tamangdir, arrshir aser yimer rongnungi tantsütila Ojala Nüngsanglemla (Mongsenyimti) alima nung küm noklang junga lir chirnur 6 den semchir 47 yutsür February 25, 2022 nü iba akumli nungi pilaogo. Ozü asüko mapang nung kiyongertem, medemertem, anükapang, yimtsür-yimer, Arogopur aser telok balala kwikati lenla balala ajanga onok yariogo; nenok ajak dang mulung nena pelaba lemsateper. Nenok nübo, rongsen, shisatsü aser tamang sarasadem asoshi Tsüngremi nenok maneni moajang, ta onoki sarasademtsür.

Oja/otsü, onok melung rongjener ajisüaka 'Khrista nung asürtem shia arutsü' ta amanga onok melung süngzüker.

- Chirnur aser Semchirtem.

**KIBONG KÜMER KÜM 50 AJUNGBA TEPELA**



Temeim Oja aser Oba.

Tsüngremi nena nem moatsüba onok ner chirnur aser semchi-semnurtem asoshi akumdong süa alitsüsa nena Tsüngremer kümsük tenem-sür metsü, lir-anasü tema lia arudang tanü nena kibong kümer küm 50 ajungba anogo tongtetsüsa arishia toktsü nung Tsüngrem tenüng asanger.

Tsüngremi nena maneni anema aliba taküm den arishi talang moajangma.

Temeim

Jala, jabasotem, anükapangtem aser semchirtem.

**MULUNGNEN O**



ASO :  
07.10.1933

ASÜ :  
27.02.2022

Onoki teti meima aliba asür **Ojala Katemlila** (Chuchuyimlang) shiranga aliba mapang nungi tasü tashi shirnokisa nübu, rongsen aser sarasadem agi yariogo, nenok temeim mapa onoki kodanga mamatsü.

Nenok ajak dang tsüngdong arua pelaba melemsateptet nung osang kaket ajanga lemsateper. Asen tulusang Tsüngremi nenok aria bilemba mapa tajung moajang, aji ozü tamang sarasadem.

- Temeim Chirnur, Anükapang aser Semchirtem.

**METETDAKTSÜR**

DALT Merali Unit Lokti Senden March 26, 2022 anepdang 10:00 ako nungi tenzüka asen Senyur kidang agitsü sangdonger. Aser kasa anogo nung asen lanur Raffle Draw alitsü metetdaksür.

Anungji, Merali nung aliba Aor lanurtem ajak iba senden nung longsoa arua shilem agitsü ayongzüker.

Sd/-  
I. A. Wati Jamir  
President

Sd/-  
Anik Walling  
Secretary

**50<sup>th</sup> Wedding Anniversary 1972-2022  
Mr A. Imdong Jamir and Mrs Subola Ozukum**



"Aser asenok atema Tsungrem temeim koba aka , aji onoki metet aser amanger"

1 Yohan 4:16

Otsüla O Obula nem Hon Jubilee moatsüba atema tenüngsang agutsur. Onok tanüla O jembia anüksü aser mapang tetemsü nung onok ajak kenü nü temeim salang nung amentsüba moajangma. Takoksang Tsüngremi nena taküm maneni arishi talang den anema aliba moajang.

Temeim Chirnurtem, Anükapang aser Semchirtem .

**Peren DPDB senden menogo**



DC's Conference Hall, Peren nung Deputy Commissioner aser vice-chairman DPDB Peren, Sentiwapang Aier, NCS-i anir Peren District Planning & Development Board (DPDB) senden agiba mapang tangokba noksa nung angur.

**Peren, Metsüremi/March 07, 2022 (TYO):** Ita shia ayonga agiba Peren District Planning & Development Board (DPDB) senden ya Hombarnü (07.03.2022) DC's Conference Hall, Peren nung agiogo. Peren DPDB senden nung Deputy Commissioner aser vice-chairman DPDB Peren, Sentiwapang Aier, NCS meden liasü, ta sangdong ka ajanga metetdaksü.

Iba senden agiba mapang züngsemtemi Peren Government College nung

power connectivity & water supply; building tasen; Peren Government College ajanga ADC HQ. Peren nungi DC Complex tashi aoba lenmang yanglushitsü aser Peren Government College NAAC Accreditation onüktem nung ajemdaker olemtepa liasü.

EE PWD (R&B) Peren, Dr. Er. Khuito Murumi-i, PowerPoint ajanga teinyakdak aliba lenmang project aser renemer aliba project tem telok dang metetdaksü.

DC-i, SDG atema data magütsü alir department tem

zunga ashi. Iba dak sendakba nung, department (SDG indang data magütsü alirtem) dang SDG indang data takaratiba nung agütsütsü asoshi lephsia metetdaksü.

Iba den bendenloksema, taruba DPDB senden nung IPR Department dang department inyakyim osang agütsütsü asoshi tuyuogo.

Kasa senden nung, District nung officer tasen District Planning Officer (DPO) aser Dy. Supdt. of Excise na telok dang metetpeladaksü, ta sangdong ajanga ashi.

**Mokokchung nung shisatokden sentong ka ayongzüker**



Tetushi tesemdanger Mokokchung Addl. D.C, Shashank Pratap Singh IAS den shisalen sayurtem aser shilem agia adenertem külemi tangokba noksa nung angur. Mokokchung, 7th March, 2022

**Mokokchung, March 7 (TYO):** Forest nung inyaker aser police-tem atema "Wildlife law enforcement and counter wildlife trafficking and biodiversity conservation" onük dak sentakba nung anogo ana March 7 & 8 nü shisatokden sentong ka Conservator of Forest Complex Conference Hall, Marepkong, Mokokchung nung takok ngua kaogo.

Iba sentong ya Nagaland Forest Department, the Wildlife Conservation Society (WCS) India aser Nagaland State Biodiversity Board (NSBB) na lungjemer ayongzüka liasü aser sentong nung parnok 50-i shilem agia liasü.

Iba sentong nung Satya Prakash Tripathi, IFS (retired PCCF & HoFF) & Chairman, State Biodiversity Board, Nagaland, aser Dev Prakash Bankhwal, IFS (retired PCCF, Wildlife) & Chief Wildlife Warden, Assam, Team Leader WCS tenadi tongti shilem agia liasü.

Iba shisatokden sentong nung Mokokchung Addl. Deputy Commissioner, Shashank Pratap Singh IAS tetushi tesemdanger liasü.

Office of the  
**Merangkongsür telongjem**  
H.Q. Merangkong  
Dist. Mokokchung :: Nagaland

**Tenüngsang Agütsür**

Wt. Tiakala Lynda Yaden, IP&TA&FS (1994), Lt. Wb. L L Yadener jala, Financial Commissioner (JS Level), Employees' State Insurance Corporation (ESIC), Ministry of Labour and Employment mendeni ajungketa konang nüngsang bener aruba atema Merangkongsür Telongjem-i pelar aser tenüngsang agütsür.

Tarutsü anogotem nung, la mapa nung takok angutsü asoshi sarasadema atar.

Sd/- Tiyungla President Merangkongsür Telongjem	Sd/- I. Bendangmenla Gen. Secretary Merangkongsür Telongjem
--	--

**SAND AVAILABLE : KANIKHAT SAND (BALU)**  
Available at Lontho (Tsurangkong)  
Per Cft. Rs. 57/- Contact: 7085231386

## ICC World Cup: New Zealand-i wicket 9 agi Bangladesh kokogo



**Dunedin, Metsüremi/March 08, 2022 (Agencies):** Hombarnü, ICC Women's World Cup nung asayamung tayonger team - New Zealand-i Bangladesh madak wicket 9 agi takok angu. Tzünglu aruba ajanga team anaprongla innings ya latetta aliba over (50) dang nungi tajemba kümer asaya liasü.

Tzünglu ajanga asaya mapang talangka thitemer sülen, over 27 (27 overs each) asayatsü lemtet. Over 27 nung New Zealand bowler temi Bangladesh nem run 140 dang agütsü aser wicket 8 agi. Tanabuba innings nung ball 42 anünga lia New Zealand-i alizüng tongtetta asaya koktet. Batter Suzie Bates-i half century (79 not out) yanglua liasü.

Iba World Cup nung New Zealand-i West Indies den mezüng asaya, saka iba match makokba sülen parnoki Bangladesh akokba ajanga point ana nguogo. Iba den

külemi World Cup table point nung New Zealand jenjang tasembuba tongtetto.

Iba alizüng (141 target) tongtetsü asoshi New Zealand pur melungi asaya tenzük. Over 7buba nung spinner Salma Khatun-i captain Sophie Devine (14) wicket agi, saka iba wicket dak alaka Bangladesh bowler temi wicket talila magitet.

Bates-i ball 68 nung run 79 yanglua liasü. Bates-i külem asayar Amelia Kerr (47 not out) den run 108 yanglutet.

Bates-i boundary ka zükloksüba mapang Women's World Cup match nung run 1000 yanglutetter batter rongnung la trokbuba aküm aser iba match nung Bates-i ODI fifty 28buba yanglua liasü.

All-rounder Bates-i 4s 8ben zülöksü, koba Bangladesh team ajungai zükloksüba 4s dang nungi ana agi timba asütsü. Kasa mapang, Kerr-ia 4s pezüben zükloksüba liasü.

Ghonda pezü tashi tzünglu ajanga asaya thitemtsüba sülen

New Zealand-i toss koka Bangladesh nem batting lezmüksü. Opener Fargana Hoque (52) aser Shamima Sultana (33) nati junga asaya tenzük.

Over pungo tashi power-play asayar sülen, wicket ka danga out mesüi Bangladesh pur run 41 nung asaya liasü. Ajisüaka, opening partnership' nung timtem adoktsüsa spin bowler aser all-rounder Frances Mackay-i wicket ka agi (1/24). Over 15buba nung Off spin bowler arishi küm 31 tain Mackay-i Hoque ya run out sütsü.

Iba sülen külem asayar all-rounder Satterthwaite (3/25)-ia junga asaya aser over pungo nung lai wicket asem agi.

Bangladesh opener ana tashi tukadokba sülen tanüngba batter nungi anati - Sultana (11) aser Mostary (13) run 10 dak tema yangluba dak alaka batter temi run 10 dang nungi tajemba yanglua liasü.

Tanabuba innings nung over 15 asayar sülen Nigar Sultana-i aniba team nungi batter 3 out süa run 81 yanglur liasü.

Bangladesh batter Ritu Moni (4)-i taoba ama junga masayatet aser lai zülöksüba ball ya Devine-i ajepzük aser iba catch' ajanga ODI cricket nung bowler Satterthwaite-i wicket 50buba agitet.

One Day Internationals nung Satterthwaite-i wicket 50 agiba den lai run 3,000 yanglur lir. Kasa jenjang ya Charlotte Edwards, Karen Rolton aser Stafanie Taylor nungeri ajangzüketteta lir.

## Spanish Para badminton International: Pramod Bhagat gold medal 3 angu



**Vitoria, Metsüremi/March 07, 2022 (Agencies):** Vitoria, Spain kübok ayongba Spanish Para badminton International II indang category asemprongla nung India nunger Tokyo Paralympics champion, Pramod Bhagat-i gold medal asem tashi nguogo.

Külem India nunger Sukant Kadam, shiba World No 4 lir, asayamung tenzük nungi junga asaya aru aser Deobar tembangba asayamung nung paia gold medal ka den silver medal ngua lir.

Gold medal angutsü asoshi tebur kija asaya nung, World No 1 Bhagat-i kanga dang meranga 17-21 21-17 21-17 agi Kumar Nitesh tsükdaktsü. Iba asaya ghonda 1 ser minute 1 nung tembang.

Temeyoktep tarep nung, World No 1 Bhagat aser Manoj Sarkar nati 21-19 11-21 21-11 agi külem India nunger temeyoktep tarep Kadam aser Nitesh tsükdakja gold medal angu.

Iba sülen, temeyoktep tarep tanga ka nung Bhagat-i ano

Palak Kohli den longjemer külem India nunger temeyoktep tarep Ruthick Ragupathi aser Manasi Girishchandra Joshi madak 14-21 21-11 21-14 agi takok ngua iba asayamung nung pai gold medal tasembuba ngutet.

"Asayamung ana tashi nung shilem mahina sülen, tanü iba takok ya kanga dang tulu aser tanga asaya dang nungi iba takok ya alakteta tajung lir," ta Bhagat-i ashi.

"Iba jenjang ajangzükettetsüsa ni kanga meranga inyakogo aser tanü iba takok ya mera tulu ka agir ama lir. Aruya aliba Grade 1 tournament' nung ano tali temulung agütsür asayatsü tebilemba lir, koba anogo asem nung tenzüksü. Tanü ajangzüketteta ama kasa asaya tasa aser yimya bener iba asayamung nung shilem aginür," ta men's singles SL3 Paralympic champion Bhagat-i shisem.

Kasa asayamung asaya tanga ka nung World no 4 Kadam-i 21-13 21-18 agi Germany nunger Marcel Adam tsükdaktsü.

Asayamung balala nung shilem agia arur Kadam-i gold medal tasembuba angur asütsü. Tebur tarep nung World No 1 tarep Pramod Bhagat aser Manoj Sarkar na makokba sülen Kadam-i silver medal angu.

"Asayamung balala nung asaya arur sülen tan asayamung nung gold medal tasembuba angur asütsü aser medal ngutettsüsa asayaba atema pelar. Iba takok ajanga taruba asayamung balala atema tajungba renemtsü aser nung maneni junga asayatsü asoshi ajungmesotsü," ta SL4 category nung shilem agir Kadam-i ashi.

"Grade 1 tournament nung tajungba asayatsü asoshi bilemdar. Anogo asem nung iba asayamung tenzüksü aser kasa tasa aser yimya amhsia asayatsü renemdar," ta pai shisem.

## Formula 1-i Russian Grand Prix contract tembangtsür



Nikita Mazepin

**Dubai/Moscow, Metsüremi/March 07, 2022 (Agencies):** Formula One-i Russian Grand Prix den züngzüktepa aliba contract tembangtsüogo aser Russia nung race masayatsü, ta Bresthibarnü sangdong ka nung Formula 1-i ashi.

Tang tagidak aliba 2022 Formula 1 calendar nung, September ita race atema Olympic Park, Sochi dena lir. Ajisüaka, taoba hopta Russia-i Ukraine amakba sülen, taoba

hopta iba race (Olympic Park, Sochi) agientsüogo.

"Russian Grand Prix promoter den contract tembangba osang Formula 1-i jangjatsür; tetezü tarutsü nung Russia nung Formula One race asayamung masayatsü," ta kasa sangdong nung shia lir.

Taoba hopta Russia mitkar temi Ukraine amakba sülen, anogo ka lir taküm indang race (Olympic Park, Sochi) agientsü lemtetter külen nungi F1-i

meratem agitsü asoshi olemtepa liasü.

Tesüiba anogo ishika tsüngda F1 tentet olmetepba mapang, Russia-i Ukraine amakba dak sendakba nung asadanger sülen, Russia nung race asayatsü ya tim masü ta bangjemtep.

Iba telemtetba tetezü, Putin yimsüsüba menden nung ali tashi, tarutsü nung F1-i Russia nung race masayatsü.

Russia nungi Formula One nung shilem agir rongnung

Nikita Mazepin kistüng alitsü. Taoba hopta Barcelona test nung arishi küm 22 tain Nikita indang racing car nungi Haas team-i Russian potash producer aser title sponsor - Uralkali dak sendakba nung branding ajak agientsüba sülen, tarutsü nung pai race asayatsü asoshi mejangjatetti lir.

Uralkali ya Mazepin tebu, oligarch Dmitry Mazepin indang lir, kong iba tesendaktep aser Russia maneni team nung shilem agitsü asoshi tan hopta tsüngda lemtettsü.

2014 küm Formula One calendar nung Russian Grand Prix aden. Tesüiba küm Olympic Park, Sochi nung race asayaba mapang Tir, Vladimir Putin dena liasü. Iba den külemi podium nung Russia lennir, Putin-i takok angur nem sempet agütsüogo.

### **BILEMDANGANG**

**"Pei putu alema yimsüsünura pei chirnur tebang nembangtsür."**